



8. augusti 2016

UKA 2016/66

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara.

Kalaallit Nunaanni aalisarfiusup iluani aalisartitseqatigiiffiup aningaasaataasa ikinnerpaamik inunnit aalajangersimasunit pigineqarnissaannik allaqqasoq assigalugu ingerlatseqatigiiffiup piginnittuisa agguagarsisarnissaasa aalisarnermut inatsimmi allaqqalersinnaanerata kingunerisinnaasai pillugit kingusinnerpaamik UKA 2017-imi nalunaarummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Hans Enoksen, Partii Naleraq)

Tungavilersuut:

Nunatsinni avammut niuernitsinni inuussutissarsiutit pingaarnersaraat aalisarneq. Qangaaniilli kultureraarput piniartuuneq aalisartuunerlu, siunissamilu attanneqaannarnissaanik anguniagaqarneq aporfilersortariaqanngilarput.

Massakkut aalisarnermut inatsit ukiunik 20-nik pisoqaassusilik attapparput, maannamullu taassuma ataani angusagut ajunngitsortaqlutillu ajortortaqarput.

Aalisarnermut inatsisip ajortortai isiginiarpallaanngikkaluarlugit, inatsisip qanoq ajunnginnerusumik iluarsartuussinnaanera piffissalersunngikkaluarluta ataavartumik ingerlattuartariaqarippat isumaqarpugut.

Ullumikkut avammut niueruteqarnitsinni nunatsinnut isertitsissutigisartakkatta 95%-ii aalisarnermeersuupput, Partii Naleqqamiillu pingaartipparput avammut niuerutiginninnermi isertitat kalaallinut tamakkiisumik iluaqutaanissaat isertitsissutaanissaallu.

Qularutigingilarpullu partiit tamarmiullutik taamatut anguniagaqartut.

Taamaammat isumaqarpugut aalisarnermut inatsimmi ingerlatseqatigiiffiup aningaasaataasa ikinnerpaamik inunnit aalajangersimasunit pigineqarnissaannik allaqqasoq assigalugu ingerlatseqatigiiffiup piginnittuisa agguagarsisarnissaasa aalisarnermut inatsimmi allaqqalernissaata anguneqarnissaa pingaaruteqarluinnartuusoq.

Ullumikkut aalisartitseqatigiiffiit inatsisitigut pisussaaffilerneqanngillat, ingerlatseqatigiiffiup piginnittuisa ukiumoortumik agguagarsiassaasa ingerlatseqatigiiffiup piginnittuisa iluminni qanoq agguataarnissaannik, piumasaqarfigineqarlutik. Taamaammallu aalisartitseqatigiiffiit namminneq iluminni iluarisaminnik iluarsartuussisinnaanerit aporfilersorneqarani.

Inuussutissarsiut avammut niuernitsinnut pingaaruteqarnerpaaq qanoq ajunnginnerusumik iluarsartuussinnaanera piffissalersunngikkaluarluta ataavartumik ingerlattuartariaqarparput.

Tamanna tunngavigalugu isumaqarpugut aalisarnermut inatsimmi ingerlatseqatigiiffiup aningaasaataasa ikinnerpaamik inunnit aalajangersimasunit pigineqarnissaannik allaqqasoq assigalugu ingerlatseqatigiiffiup piginnittuisa agguagarsisarnissaasa aalisarnermut inatsimmi allaqqalernissaa pinartuusoq, isumagineqapallattariaqartuusorlu.

Assat paarlallugit isiginnaartutut qeqqiinnarluta pinissarput orniginngilarput. Eqqissilluta tuaviorluta "qassutini" putoq una matusariaqarparput, partiip qalipaataa aallaaviginngikkaluarlugu.

Tassami nuna manna uagut pigaarput siulitta tunniussaata, taamaammat sanarfissavarput inuiaqatigiinnut kalaallinut naapertuuttumik ingerlaaseqartuaqqullugu.

Allaffissornikkut aningaasatigullu pisortanut kingunerisinnaasai:

Nalunaarusiornerup qulaani taakkartorneqartup suliarinerani allaffissornikkut suliallit ukiup sisamararterutaanut naammassisinnaasaattut naleqassasoq taggipparput.

Tamatuma saniatigut nutserinernut aningaasartuutit immikkut aamma isiginiarneqarumaartussaasut eqqarsaatigisinnaavarput.

Allaffissornikkut aningaasatigullu inuiaqatigiinnut kingunerisinnaasai:

Naalakkersuisunik nalunaarusiortitsineq inuiaqatigiinnut toqqaannartumik kinguneqarnaviangilaq.

Allaffissornikkut aningaasatigullu namminersortunut kingunerisinnaasai:

Nalunaarusiornerup allaffissornikkut aningaasatigullu namminersortunut toqqaannartumik kinguneqarnissaa ilimagineqanngilaq.

Avatangiisinut kingunerisinnaasai:

Allaffissornermi atortooreersut atorlugit nalunaarusiaq suliarineqarpat, toqqaannartumik pinngortitamit pilersitanik atuinerulernissamik kinguneqarnissaa ilimagingilarput.

Taamaattumillu nalunaarusiortitsinerup avatangiisinut mingutsitsinerunermik kinguneqarnissaa ilimagingilarput.